

E jenöchlich Kaffepüsje

Von Marita Dohmen

„Wie wör et, ha’mer uns noh dä schwer Enkaufstuur jetz nit en Tass Kaffe en enem schattije Stroßecafe verdeent?“, frohchten et Meiers Nies singe Nelles. „Die Frohch hädden vun meer sin künne, wo ich doch däjennije ben, dä die ganze Büggele och noch schleppe muss“, laachten dä, revv sich met singem Sackdohch der Schweiß vun der Steen un leef schnurstracks op die Desch vör der Antoniterkirch zo.“ Se satzten sich aan ene freie Desch. „Meer hätte jän zwei Tasse vun Örem jode ‚Köln-Cafe’“, bestellten hä tireck. „Nelles“, fispelten et Nies, wie die Bedeenung fott wor, „wääß dann he en Kölle och Kaffe?“ „Natörlich nit, do Doll, dä heiß esu, weil sich he en Kölle wie och en ander Städte Lück doför stark maache, Kaffe fair ze handele. Waabe deit dä en Kolumbien, Nicaragua un Bolivien un weed als Bio-Kaffe aanjebaut. Die Boore krijjen ene aanjemesse Pries för ehr War plus 10% Entwecklungszoschlaach. För die Mih-Arbeit beim Bio-Aanbau jitt et noch ens 15% bovwendrop. Dat määt dä Kaffe zwor jet dörer, ävver mer kann in met enem jode Jewesse drinke un deit och noch jet Jots dobei.“

„Eja“, saat et Nies, wat der ehschte Schluck, kaum dat’e jebraat woode wor, allt probeet hatt, „un jot schmecke deit’e och noch. Jedenfalls, wa’mer sich nit, wie do, veer Löffel Zucker dren deit.“ „Ich röhre jo nit öm“, jriemelten der Nelles „söns wör’e meer ze söß. Üvvrijens feet der ‚Köln-Cafe’ am ehschte September singe fünnefte Jebootsdaach. Dann ess em Domforum schwer jet loß. Et jitt och ene Ömesönskaffe un e Priesrötsel.“ „Dat wör doch ene jode Jrund för mich, dat neue Sommerkleid, wat mer hück jekauf hann, aazedunn. Vileich ha’mer jo Jlöck mem Wedder, su wie hück. Durch dä iwije Rän, dä mer de letzte Woche hatte, mööte de Wolke doch no leer sin. Andersicks kann ich jo fruh sin, dat mer de ganze Zick su e Messwedder hatte. Dodurch wore de Priesse för unse Enkauf ärch eravjesatz.“ „Eja“, laachten der Nelles, „un do häs, wie immer, mih jekauf, wie de eijentlich wolls.“ „No jevv allt Fredde, Joldstöck, do bes doch stolz wie ne Pädsköttel, wa’mer op der Kaffe-Jebootsdaach en et Domforum jonn un ich dann jot ussinn. Odder nit?“ Der Nelles laat singe Ärm om si Fräuche, lo’te et leev aan un saat nix mih.

Erschienen als Kolumne „Kölsch Verzällche“ in der Kölnischen Rundschau vom 16. 08. 2007